

Anwar mahu Umno langsaikan kes Papa Gomo
Malaysian Insider
June 21, 2014
Oleh Jamilah Kamarudin

Ketua Umum PKR Datuk Seri Anwar Ibrahim enggan melayan permohonan pengendali blog Papa Gomo yang mahu membayar ganti rugi secara ansuran sebanyak RM100 sebulan.

Enggan mengulas lanjut, Anwar sebaliknya meminta Umno sendiri yang menyelesaikan masalah itu.

"Jangan tanya saya, tanya pemimpin Umno yang taja dia," katanya kepada pemberita selepas menyampaikan ceramah Asian Renaissance di Puchong, hari ini.

Mahkamah Tinggi Kuala Lumpur semalam menolak permohonan Wan Muhammad Azri Wan Deris menanggungkan bayaran ganti rugi sebanyak RM800,000.

"Saya cuba mohon dengan mahkamah untuk bayar RM100 sebulan kepada Ketua Pembangkang Datuk Seri Anwar Ibrahim kerana sekarang hanya bekerja sebagai nelayan," katanya dipetik laporan media semalam.

Wan Muhammad Azri turut mengaku sudah menjual saham miliknya di KL POS Media & Production Sdn Bhd.

Pada 28 Februari lalu, Pesuruhjaya Kehakiman Mahkamah Tinggi Rosilah Yop memerintahkan Wan Muhammad Azri membayar ganti rugi sebanyak RM800,000 dan kos RM50,000 kepada Anwar berhubung penyiaran perkataan fitnah dan meletak imej mengaitkan Anwar dalam video seks dalam blog miliknya.

Rosilah dalam penghakimannya berkata, daripada keterangan yang dikemukakan, terbukti Wan Muhammad Azri adalah blogger Papa Gomo dan menerbitkan kenyataan fitnah.

Anwar memfailkan saman terhadap Wan Muhamamad Azri pada 21 Mac tahun lalu dengan menuntut ganti rugi berjumlah RM100 juta kerana mendakwa Wan Muhammad Azri menyiarkan empat siri perkataan fitnah di laman blog berkenaan pada 16, 17, 19 dan 20 Mac 2013.

Dalam perkembangan lain, Ahli Parlimen Lembah Pantai Nurul Izzah Anwar ketika diminta mengulas mengenai kesihatan Anwar berkata, ayahnya tidak mengalami apa-apa simptom penyakit yang serius.

Nurul Izzah berkata, Anwar hanya menjalankan pemeriksaan kesihatan biasa di Institut Jantung Negara di Kuala Lumpur dan dibenarkan keluar wad pagi tadi.

"Dia cuma mengalami jangkitan paru-paru selepas beberapa hari batuk dan tidak sihat.

"Doktor cuma menasihatkannya supaya banyakkkan berehat," katanya. – 21 Jun, 2014.

Hakcipta © 2013 The Malaysian Insider

Source: <http://www.themalaysianinsider.com/bahasa/article/anwar-mahu-umno-langsaikan-kes-papa-gomo>